

## Jahresbericht der Präsidentinnen HV 16.2.18

---

### Claudia

S'Veinsjahr hät mit de 57.HV agfangä. Allesm isch Tip top über Bühni gangä und mir händ 6 neu Mitglieder dörfä in Verein ufnäh. Das isch doch eifach lässig. Nach em offizieel teil isches denn zum gmüetliche übere gangä. Mir händ Lotto gspielt. Wämmer di erscht Reihe Lotto gha het, hets es chlises Gläslü Honig geh. Bi zwei Reihe en Guetschii für es Glace vom Waldegg und bi de ganze Charte en Goldigä taler. So isches denn los gange. Und scho gli hets grueffä:.....Burger! es isches Glächter dur di Schar Fraue dure gange. Diana het als erscht Lotto gha. A was het si echt denkt?? Mir händ doch erscht grad Znacht gha..... so isches denn wiiter gange. und Edith het mit de babette zäme di ganzi Charte volle gha. So händs denn müesse mit Jasscharte uslose. Edith het denn de Goldig taler und babette es zweierli Dole chöne mit hei neh. Diana het denn grad numal en Honig und en Glaceguetschii gwunnä. Do chamer denn wüekli säge: sie kam sah und siegte.....

### Nadja

2 Täg noch dä HV isch d Rüeterswilerstross wieder einmol meh zur Fasnachtsstross wordä. Vieli bunt verkleideti Menschä gross und chli, orginell gestalteti Wägä. Au 7 Frauä us üsem Verein händ sich bim Mehrzweckgebäude i Umzugskollonä iehgreiht. Punkt 13:00 Uhr isch das bunti Trieben dä Stross entlang losgangä. Mir süssä Trübä vom Landfrauenverein sind nöd z überseh gsie mit unsärnä üppige Kostüm us grünä und bordaux-rotä Ballön. Jedäs Kostüm isch us 40-50 Ballön bestandä. Mir händ müesä ufpassä das ja kein Ballon zerplatzt isch, suscht händ Trübä gfählt a dä Trupplä. D Zuschauer händ grossi Freud a üsäräm Sujet gha, Kompliment händ sich nur so ghüft.

### Martina

Bi schönstem Wetter am 3. März händ sich am Morgen ä Hordä warm agleiti Frauä uf äm Chiesplatz versammlät, die eintä mit dä Ski`s die andärä mit gutem Schuehwerch. Mir händ üs uf PW`s verteilt wo bereit gstandä sind und sind is Gebiet Sattel-Hochstuckligfahrä. Obä uf äm Berg acho hät au scho üsen obligate Kafi mit Gipfeli im « Mostler`s Q-Hof» uf üs gwartät. Die gemütlich, urchig Bergbeiz mit Charm hät dä Frauen sehr guet gfallä. Frisch gstärcht händ mir üs uf Piste gmacht. D Wanderinnen sind zerst ächli dä Skipiste entlang gloffä bis sich dä Wäg trennt hät, dur dä verschneiti Winterwald überStock und Schnee ischäs zügig vora gangä und trotzdem isch di schöni Winterlandschaft und s Panorama bestunt wordä. Nochämänä Apèro-Halt an der Sunnä mit sicht uf d Skipiste wo mir d Skifahrerinnen gseh händ mit äm Bügellift uefahre händ mir üns pünktlich um d Mittagsziet mit dä Pistenflitzerinnen im Restaurant Herrenboden wo für üs Landhühner Platz reserviert gsie isch troffä. Frisch gstächt mitämnä feinä Zmittag im Buch sind die einä numol mit Vorsicht uf Pistä gangä, do dä Schnee rächt sulzig wordä isch. Di anderen mit chlienerä Schritt äm Wanderweg entlang. Mit chlienärä Schritten deshalb, wil mir von äs paar jungä Mannä wo für dä Litering bemüeht gsie sind üs drum Säckli id Hand druckt händ mit dä Bitt:» mir sölä doch dä Abfall wo uf und am Wäggrand liet zämä neh. Eini vo dä Fraue häts den psunders erscht gno und gfundä «Sie heg jo dä Sack no nödamol voll drumm laufi sie is Tal» und lueg au do, undä acho hät sie 1 1/2 Säck gfüllt gha.Zfriedä händ mir üs den uf dä Heiwäg gmacht. Vielä herzlichä Dank Martina für d Organisation vo dem unvergesslich schönä Tag.

## Claudia

Zum Thema „Blühender Humor“ sind mir zur Büürinätägig nach Eschenbach igladä wordä. Tisch und Turnhallä isch Früehligshaft mit viel Blueme dekoriert gsi. En wahre Augeschmauss. De Referat Martin Sumi hät di ganz Turnhalle , mit sinä Gschichtä und Witz zum fascht ununterbrochene Lachä brocht. Mit dä Schuelchind wo gsungä händ , hätt mer sich chöne erholä vo dä Lachmusklä, wo sich am Buuch scho bemerkbar gmacht händ. Äs isch en lässige Numittag gsi , wo mir Fraue wieder ä mol so richtig händ chönä Lachä.

## Petra

Nocherä chaltä Wuchä, hät pünktlich zu eusem Pflänzämärt d'Sunnä fährä güüggslet. So händ mir wieder ä erfolgrichä Pflänzämärt dörfä durä fährä. I däm Jahr isch ja alles scho chli spezieller und grösser gsi. Dur dä Kontakt zum IG Goldingertal, händ mir 4 neuu Märtfahrer bi eus dörfä begrüessä. Au häts zusätzlich zum Kinderbastlä au no es Kinderschminkä ghä. Beides isch sehr rege vo dä Chindä gnutzt wordä. Aber dä Höhepunkt hät sicher am Namitag statt gfundä. Da hät nämlich Diana es gratis Konzert ghä, als i Stand bi eus Landfrauä. Ich möcht mich a derä Stell numal ganz herzlich bi dir Diana bedankä. Merci vielmal.....

Au möcht ich a derä Stell Sponsorä nu erwähnä. Pro Zürcher Berggebiet, Innovero GmbH, Rickli Elektro und Artho AG.

## Claudia

Mit eme chlinä Grüppli vo 11 Frauä sind mir am Mittwuchmorge mit de Auto nach Oberbüren gfährä. Priska isch mit dä ÖV agreist. D'Firma wird vo dä Gebrüeder Züger idä zweite Generation gfühert. Zärscht händ mir en Film über Firmägschicht aglueget und nacher dur Firma gfühert worde . bevor mir aber händ chöne loszotlä, händ mir üs müesse anere gründlichä Reinigung und abzieh vo jeggliche Schmuckstück unterzieh. Üs isch denn au klar worde warum: mir händ Hutnöch dörfä ade Maschine verbii laufe und zueluege. Züger macht vieli Produkt für Grossverteiler und anderi Firmene. So zum Bisbiel Garantie Prix oder Free from. Mängsmol chamers nur ade Nummere 5767 erkenne. Zum üs das merke hät dä einti vo dene Brüedere gmeint: dass zwüsched 57 und 67 beschi Alter isch. Mir händ denn au nu in Ladä dörfe go pöschtele. Händ aber üsi Produkt selber müesse zäme rechne, will dä Ladä eigentli nur am Numittag offä hät und das irgendwie falsch komuniziert worde isch. So sind mir eme Sack voll feine Sache heiwärts gfährä.

## Petra

Amenä heissä Junitag händ sich 9 Frauä uf dä Wäg nach Hombrechtikä zur Stiftig Brunegg gmacht. Döt hät üs bereits dä Martin Knecht (Leiter vo dä Gärtneri Brunegg) erwartet. Dä Martin (au Chappeler) hät eus erst öbis über Stiftig und über dä ganzi Ablauf verzellt. Nachher sind mir uf dä Rundgang mit Ihm gstartet. Bi dä Triebhüser sind mir relativ züig durä, suscht het euses T-shirt no meh am Ruckä klebet. Bi dä Werkstatt händs mir den umso gmüetlicher gno. Bi eim Ruum sind alli Frauä fasziniert gsi und zwar bim sogenannte Snuzletzimmer. Der chönd Bewohner für sich ä Stund oder zwei ha und eifach relaxe,lesä, musik losä.....

Nach dä Führig sind mir Frauä go lernä, wiä mer en Struss richtig bindet. Unter Fachkundiger Awisigä sind 9 wunderschöni Blüemästruss entstandä. So händ mir jetzt eusi Stärkig mit Kaffi und Chuechi meh als verdient gha. Nachem ikauf i dä Gärtneri, händ mir eus mit eusem Bluemästruss uf dä Heiwäg gmacht.

## Nadja

Am 28. Juni häts dä Petrus gar nöd guet gmeint mit üs Landfrauä. Punkt sechsi häts agfangä Rägnä wie än Wasserfall däbie händ mir doch üserä Obigspaziergang agseit gha. Dä isch den halt Wort Wörtlich is Wasser gfallä den au am halbi siebni häts immerno i Ströhmä gseicht. Jänu nüt desto trotz händ mir üs i Auto verteilt» was no nie so schnell gangä isch.

Die einä händ no än zwüschähalt a verschiedene Adresse iegleit das sich die wo wie begossni Pudelinä gsie sind händ chönä go trochä alegä. Uf direktem Wäg ischäs den is Restaurant Flugplatz Wangen gangä. Mir sind ä schöni Schar Fraue gsie wo sich dä Obig nöd dur dä Rägä verderbä loh händ. Bimänä feinä Nachtessä oder Dessert isch viel gschwätzt und glachät worde. Zfriedä und die eintä mit viel Neue News händ mir üs churz vor Mitternacht wieder uf dä Heiwäg gmacht.

## Martina

Wie mehrmals in dem Vereinsjahr, isch au üseri Pilatus-Wanderig sehr nass usgfalle. Trotz em garstige Wätterbricht hed sich en guet glunti Schar Wanderfraue am 11. August uf em Bus Richtig Rapperswil troffe. Uf de Zug-Fahrt hend wir Ziit kä, ds Alternativ-Programm z'bespräche. Alli sind motiviert gsi, au im Räge es biz z'wandere. So sind mir alli ab Hergiswil uf de Variante 2 gloffe, jedoch sind denn die Fittere au ds Bähnli-Stück z'Fuess gange. Obe im Panoramarestaurant Alp Gschwänd hend mir zwar keis Panorama, aber defür de ander Teil vo üsere Gruppe zäme mit eme fidele Typ atroffe. Är isch scho es biz übernachtiget gsi, aber die hends wahnsinnig lustig kä mit ihm und sinem Kolleg! Är hed denn Ruth Küng scho bald mit „Tante-Ruth“ agsproche. Nach dem Mittagshalt (übrigens mit feinem Mittagässe) isch es wiiter gange. De Räge hed zuegleit und en chalte Wind hed blose! Spätestens jetzt isch wohl jedi vo dene Fraue froh gsi, nid ganz obe uf em Pilatus unterwägs z'sii... So hend alli möglichst gschwind zum Chrigel id Krienseregg welle. Im heimelige und liebevoll dekorierte Naturfründehuus sind wir vo de Judith und em Chrigel hätzlech empfangen und guet bewirtet worde. De späteri Nomitag hend mir mit Jasse verbracht und denn heds en feine Znacht gä. Mir hend üs scho uf en gmüetliche Spili-Obig isgestellt, da tönts plötzlich: „Tante Ruth“! Tatsächlich hend üs die zwei Lustige-Männer vom Mittag wieder gfunde – und si hend grad no Verstärkig mitgno: A de Handorgele de Bäcker Habermacher und am Keyboard en Optiker. So hend mir es Privatkonzert dörfe gniesse... Ja, mir hend en üsersst fröhliche Abed verbracht. **(Film)** Da hed ds spendierte Schnäpsli vo de Margrit Tschümperlin guet dezue passt – hätzleche Dank! D' Nacht isch so gsi, wie halt en Masselager-Nacht isch. Aber nach em Zmorge-Buffer und em Gruppfoto hend alli wieder möge. En letzte Rägeschauer grad nach em Start, aber denn hed's immer meh uf ta und wo mir in Hergiswil acho sind, hed Sunne möge schiine. Nur de Pilatus isch no immer im Näbel gsteckt! Nach em Bsuech i de Glasi hend mir zum Usklang vo dene zwei Täg en schöni Schiffahrt bis Luzern dörfe gniesse.

## Nadja

Das Johr hät Völkturnier ohni üs Landhühner statt gfundä, mangels Teilnehmerinnä

Vereinsausflug Liest **Priska Raymann (Rösli verdanken)**

## Martina

Am 17. September hend mir i de Chile z'Chappele de Erntedank-Gottesdienst mitgstaltet. Zum Thema „Danke sagen für die Gaben Gottes“ hend mir dekoriert, Text vortreit und am Schluss no en richhaltige Apéro usgschenkt. An dere Stell möcht ich nomal de Daniela Scherrer vielmal danke fürs Mithälfe bim Dekoriere. Theres Blöchliger hed bim Ufstelle mitapackt; Martina Schmucki hed vorgläse und Heidi Oberholzer und Yvonne Kempf hend üs bim Apéro unterstützt. Au euch nomal hätzleche Dank. Es wiiters Dankeschön geit an alli andere Mitglieder, wo de Gottesdienst (ob mit oder ohni Landfraue-Tüechli) bsuecht hend.

## Claudia

am 24. Oktober sind 10 Fraue is Hürlimaa bad uf Züri go badä. Da ich mich in Züri nöd so uskänne, han ich d'Isabel, wo au mit cho isch agstellt zum üs fühere, will sie sich uskännt in Züri. So simmer denn bim HB usgstige und händ denn det s'Tram 13 müesse neh. Eh nei....doch 17 wo grad vor dä Nase abfahre isch. aber mir händs denn paar Minute spöter gnoh. Im Bahnhof Engi simmer denn usgstigä und händ üs via Reiseleiterin und Google-örtsch füherrä loh. Während 2 sich im Irish-Römisch Bad verwöhne loh händ, sind di andere di verschidene Bäder go usprobierä und händ natürli au nu äs Cüüpli die Lounge-Bar gnossä. Badenixe sind denn am Schluss no ufs Dachbad gange, und händ di romantisch Obigstimmig und Usicht über ganz Züri gnossä. Idä Pizzeria Don Leone am Waffeplatz, au mit Reiseleiterin und Google-örtsch gfundä, hämmer denn alli ä Hammer feini Megapizza gässe. Usert „s'Babini“ hät Pesto und Ice Tea gnossä, was au sehr fein gsi isch. Sie hät nu gern äs Frappé gha, aber für das hets denn nümä glanged, will mir üs händ müesse uf dä Heiwäg machä. Müed und suuber gwäsche sind mir denn mit Zug und Bus am elfi wieder guet acho in Chappele. Äs isch en lässige Obig gsi und dä Frauä hets gfallä. Dir Isabel numol herzlichä Dank für diä super Stadtfüherig.

## Nadja

Au das johr isch am 7. November wieder Pausemilch Aktion uf em Programm gstandä. De Vorstan hät a zahlrichä Schuelchind vo Chappele dörfe feini Milch Nature oder mit Schoggi oder Erdbeer Gschmack usschänkä. Au äs stüekli Zopf chunt natürli bi dä Chind und bi dä Lehrer immer sehr guet aa und schätzed das sehr und mir freued üs über di frählichä Gsichter.

## Martina

Wieder eimol meh isch am Samstag fliessig gschnitte, bundä, gsteckt, kläbät wordä, so sind mengi Advents- und Tür-Chränz, und Chertzägsteck entstandä wo mir am Sunntig a Maa und Frau verchauft wordä und mir so üseri Vereinkasse um äs paar Frankä ufbesserä händ. Viele herzlichä Dank a alli Fraue wo üs Tatchräftig i irgend einerä From a dem Märzwuchäend unterstützt händ.

## Petra

Bimenä Coiffeurbsuech han ich vom Projekt dä Grösch Adventskranz in Moslig erfahrä. Bin natürli sofort hei go googlä. Den isch klar gsi, das isch öbis für üs Landfrauä. Abem 1. Dezember isches den au no offiziel gsi, Moslig stahd dä Gröschti Adventskranz miteme Durchmesser vo 121.6 Meter. Am 7. Dezember händ sich den 19 Landfrauä uf dä Wäg nach Moslig gmacht um dä Adventskranz z'bestunä. Dä Kranz ist ganz unterschiedlich dekoriert gsi, darum häts au immer öbis neus z'bestunä ghä. Sogar ägschtra es Gschichtli isch für dä Kranz gschriebä wordä. Nachem bewunderä vom Kranz und dä Adventsfenster sind mir eus gern is Racletttestübli go uf wärmä. So hät au dä Gsellig Teil vo dem Abend chönä stattfindä.

## Nadja

5 Frauä händ sich troffä ums das Thema z besprechä, mir sind üs äber glie einig wordä das äs mittmachä am Umzug mit nur sonerä chlinä Gruppä schlichtweg nöd würkt. Themas und Sujets hetät mir öpä äs Originells gha, aber äbä. Vielleicht gits negscht Johr wieder ä Gruppä mir wird's gseh.

## Martina

Am 16. Januar händ sich dä Vortsand vo dä Büürinnä Walde und dä Vorstand vo üs Landfrauä troffä zum Dekoration bastlä für Delegierteversammlig und Jubiläumsvehschau. Äs isch gliimed, gscliiffed, bändelet und zupft worde. So sind am Schluss 70 originelli Holzchüeh entstandä. En grossä Dank goht ad Artho AG ,wo üs diä Holzchlötz spendiert händ.

## Claudia

Am letschte Samstig sind denn die Holzchüeh zum isatz cho als Dekoration adä delegiertäversammlig vom St.Galler Braunviehzuchtverband. Äs paar Frauä vo dä Büürinnä Walde und vo üs Landfraue händ diä guet 200 Gäst mit Getränk, Sändwich, Kaffi und Torte bedient. Es isch en ribigslose Ablauf gsi und üsi Fraue händ das super gmacht . während dä Versammlig händ mir chöne Pause mache und usgibig Schwätze mitenand, so han ich di Chance genutzt und äs paar Föteli gmacht. Dä Fraue numol Ganz herzlichä Dank für eure Isatz.

## Petra

Eimol im Monat vom Oktober bis März gönd es paar Landfrauä unter dä leitig vo dä Ruth Küng abwechsigswiis uf Oberhelfenschwil oder nach Bad Ragaz go badä. Dir Ruth äs herzlichs Dankeschön für dini Bemühigä. Dä letscht Winter isch s'Badä leider nöd so bsuecht worde. Aber vilicht möchte di eint oder ander glich emol go badä. Uf jede Fall isch jedi herzlich Willkomme.

## Claudia

Au im Johr 2017 häts im Landfrauäverein Nachwuchs geh. So händ mir dörfä dä Andreas Tschümperlin zu dä Tochter Mia gratulierä. Mir werdet denn nu verbii goh und ihre än Goldigä Taler überreichä. Mir wünsched ihre und dä ganzä familie wiiterhin viel freud und schöni Momänt mit äm chlinä Sunneschii.

## Nadja

So sind mir jetzt fascht am Änd vo üsem Johresbricht. A derä stell möchtet mir üs bi üserne zwei Vorstandsfraue, de Petra und de Martina ganz herzlich bedankä für ihri gleischteti arbet s'ganz johr dur und natürli für geduld und s'verständnis üs gägänüber. Ohni eui würs nöd goh. Merci vielmol.

Au wettit mir au a eui Mitglieder danlä sägä, fürs mitmachä a all denä Aläss dur s'ganzi Johr. Ohni eui würs dä Verein nöd geh und wer weiss vilicht gseht mer di einti oder anderi nu chli meh a dä vereinsaläss.

